

四庫全書

史部

欽定四庫全書

史部

舊唐書卷一百四十九至
五十三

詳校官編修臣曹誠

洗馬臣王坦修覆勘

覆校官主事臣李駿

校對官中書臣施光輅

謄錄監生臣任楫文

欽定四庫全書

舊唐書卷一百四十九

後晉司空同中書門下平章事劉 昫撰

列傳第九十九

于休烈 子肅肅子教教子琮 令狐峘

歸崇敬 子登登子融 奚陟

張薦 子又新希復子讀 蔣 乂 子係仲

柳登 弟冕子縝 沈傳師 子詢

于休烈河南人也高祖志寧貞觀中任左僕射為十八
學士父默成沛縣令早卒休烈至性貞慤機鑒敏悟自
幼好學善屬文與會稽賀朝萬齊融延陵包融為文詞
之友齊名一時舉進士又應制策登科授秘書省正字
累遷右補闕起居郎集賢殿學士轉比部員外郎郎中
楊國忠輔政排不附已者出為中部郡太守值祿山構
難肅宗踐祚休烈自中部赴行在擢拜給事中遷太常
少卿知禮儀事兼修國史肅宗自鳳翔還京勵精聽受

嘗謂休烈曰君舉必書良史也朕有過失卿書之否對
曰禹湯罪己其興也勃焉有德之君不忘規過臣不勝
大慶時中原蕩覆典章殆盡無史籍檢尋休烈奏曰國
史一百六卷開元實錄四十七卷起居注并餘書三千
六百八十二卷並在興慶宮史館京城陷賊後皆被焚
燒且國史實錄聖朝大典修撰多時今並無本伏望下
御史臺推勘史館所由令府縣招訪有人別收得國史
實錄如送官司重加購賞若是史館收得仍赦其罪得

一部超授官資得一卷賞絹十匹數月之內惟得一兩
卷前修史官工部侍郎韋述陷賊入東京至是以其家
藏國史一百一十三卷送于官肅宗以太常鍾磬自隋
已來所傳五音或有不調乾元初謂休烈曰古者聖人
作樂以應天地之和以合陰陽之序則人不夭扎物不
疵癘且金石絲竹樂之器也比親享郊廟每聽懸樂宮
商不備或鐘磬失度可盡將鐘磬來朕當於內自定太
常集樂工考試數日審知差錯然後令別鑄造磨剋及

事畢上臨殿親試考擊皆合五音羣臣稱慶休烈尋轉
工部侍郎修國史獻五代帝王論帝甚嘉之宰相李揆
矜能忌賢以休烈修國史與已齊列嫉之奏為國子祭
酒權留史館修撰以下之休烈恬然自持殊不介意舊
儀元正冬至百官不於光順門朝賀皇后乾元元年張
皇后遂行此禮休烈奏曰周禮有命夫朝人主命婦朝
女君自顯慶已來則天皇后始行此禮其日命婦又朝
光順門與百官雜處殊為失禮肅宗詔停之代宗即位

甄別名品宰臣元載稱之乃拜右散騎常侍依前兼修國史尋加禮儀使遷工部侍郎又改檢校工部尚書兼判太常卿事正拜工部尚書累封東海郡公加金紫光祿大夫在朝凡三十餘年歷掌清要家無擔石之蓄恭儉溫仁未嘗以喜愠形於顏色而親賢下士推轂後進雖位崇年高曾無倦色篤好墳籍手不釋卷以至于終大歷七年卒年八十一有集十卷行於代嗣子益次子肅相繼為翰林學士是歲春休烈妻韋氏卒上以休烈

父子儒行著聞特詔贈韋氏國夫人葬日給鹵簿鼓吹
及聞休烈卒追悼久之褒贈尚書左僕射賻絹百匹布
五十端遣謁者內常侍吳承倩就私第宣慰儒者之榮
少有其比肅官至給事中肅子教教字踊中以家世文
史盛名少為時彥所稱志行修謹登進士第釋褐祕書
省校書郎湖南觀察使楊憑辟為從事府罷鳳翔節度
使李鄴鄂岳觀察使呂元膺相繼辟召自協律郎大理
評事試監察御史元和六年真拜監察御史轉殿中歷

倉部司勲二員外萬年令拜右司郎中出為商州刺史
長慶四年入為吏部郎中其年遷給事中昭愍初即位
李逢吉用事與翰林學士李紳素不叶遂誣紳以不測
之罪逐於嶺外紳同職駕部郎中知制誥龐嚴司封員
外郎知制誥蔣防坐紳黨左遷信汀等州刺史黜詔下
教封還詔書時人以為與嚴相善訴其非罪皆曰于給
事犯宰執之怒伸龐蔣之屈不亦仁乎及駁奏出乃是
論龐嚴貶黜太輕中外無不大噓而逢吉由是獎之尋

轉工部侍郎遷刑部出為宣歙觀察使兼御史中丞教
溫裕長者與物無忤居官亦未嘗有立周踐臺閣三為
列曹侍郎謹順自容而已太和四年八月卒年六十六
贈禮部尚書四子球珪瓊皆登進士第瓊落托有大
志雖以門資為吏久不見用大中朝駙馬都尉鄭顥以
琮世故獨以器度奇之會有詔於士族中選人人才尚公
主衣冠多避之顥謂琮曰子人才甚佳但不護細行為
世譽所抑久而不調能應此命乎琮然之會李藩知貢

舉顗託之登第其年遂升諫列尚廣德公主拜駙馬都尉累踐臺閣揚歷藩府乾符中同平章事黃寇犯京師僖宗出幸琮病不能從既僭號起琮為相琮以疾辭迫脅不已琮曰吾病亟矣死在旦夕加以唐室親姻義不受命死即甘心竟為賊所害而赦公主主視琮受禍謂賊曰妾李氏女也義不獨存願與于公并命賊不許公主入室自縊而卒廣德閨門有禮咸通乾符中譽在人口于族内外冠婚喪祭主必自預行禮諸婦班而見之

尊卑答勞咸有儀法為時所稱珪球皆至清顯

令狐峒德棻之玄孫登進士第祿山之亂隱居南山豹
林谷谷中有峒別墅司徒楊綰未仕時避亂南山止於
峒舍峒博學貫通羣書有口辯綰甚稱之及綰為禮部
侍郎修國史乃引峒入史館自華原尉拜右拾遺累遷
起居舍人皆兼史職修玄宗實錄一百卷代宗實錄四
十卷著述雖勤屬大亂之後起居注亡失峒纂開元天
寶事雖得諸家文集編其詔策名臣傳記十無三四後

人以漏落處多不稱良史大歷八年改刑部員外郎德宗即位將厚奉元陵峘上疏諫曰臣聞傳曰近臣盡規禮記曰事君有犯而無隱臣幸偶昌運謬參近列敢竭狂愚庶裨分寸伏惟陛下詳察臣讀漢書劉向傳見論王者山陵之誠良史稱歎萬古芬芳何者聖賢之心勤儉是務必求諸道不作無益故舜葬蒼梧不變其肆禹葬會稽不改其列周武葬于畢陌無丘壠之處漢文葬於霸陵因山谷之勢禹非不忠也啓非不順也周公非

不悌也景帝非不孝也其奉君親皆從微薄昔宋文公
始為厚葬用蜃炭益軍馬其臣華元樂舉春秋書為不
臣秦始皇葬驪山魚膏為燈燭水銀為江海珍寶之藏
不可勝計千載非之宋桓魋為石椁夫子曰不如速朽
子游問喪具夫子曰稱家之有無張釋之對孝文曰使
其中無可欲雖無石椁又何戚焉漢文帝霸陵皆以瓦
器不以金銀為飾由是觀之有德者葬逾薄無德者葬
逾厚昭然可觀矣陛下自臨御天下聖政日新進忠去

邪減膳節用不珍雲物之瑞不近鷹犬之娛有司給物
悉依元佑利於人也遠方底貢惟供祀事薄於已也故
澤州奏慶雲詔曰以時和為嘉祥邕州奏金坑詔曰以
不貪為瑤恭惟聖慮無非至理而獨六月一日制節文
云應緣山陵制度務從優厚當竭帑藏以供費用者此
誠仁孝之德切於聖衷伏以尊親之義貴於合禮陛下
每下明詔發德音皆比蹤唐虞超邁周漢豈取悅凡常
之目有違賢哲之心與失德之君競其奢侈者也臣又

伏讀遺詔曰其喪儀制度務從儉約不得以金銀錦綵
為飾陛下恭順先志動無違者若制度優厚豈顧命之
意耶伏惟陛下遠覽虞夏周漢之制深惟夫子張釋之
之誠虔奉先旨俯遵禮經為萬代法天下幸甚今赦書
雖已頒行諸條尚猶未出此時奉遺制敷聖理固未晚
也伏望速詔有司悉從古禮臣聞愚夫之言明主擇焉
况臣忝職史官親逢睿德恥同華元樂舉之為不臣也
願以舜禹之理紀聖猷也夙夜懇迫不敢不言抵犯聖

明實憂罪譴言行身黜雖死猶生優詔答曰朕頃議山陵心方迷謬忘遵先旨遂有優厚之大卿聞見該通識度弘遠深知不可形於至言援引古今依據經禮非惟中朕之病抑亦成朕之躬免朕獲不予之名皆卿之力也敢不聞義而徙收之桑榆奉以始終期無失墜古之遺直何以加焉初大歷中劉晏為吏部尚書楊炎為侍郎晏用嶮判吏部南曹事嶮荷晏之舉每分闕必擇其善者送晏不善者送炎炎心不平之及建中初嶮為禮

部侍郎炎為宰相不念舊事有士子杜封者故相鴻漸子求補弘文生炎嘗出杜氏門下託封於峴峴謂使者曰相公誠憐封欲成一名乞署封名下一字峴得以志之炎不意峴賈即署名託封峴以炎所署奏論言宰相迫臣以私臣若從之則負陛下不從則炎當害臣德宗出疏問炎炎具言其事德宗怒甚曰此姦人無可奈何欲決杖流之炎苦救解貶衡州別駕遷衡州刺史貞元中李泌輔政召拜右庶子史館修撰性既僻異動失人

和在史館與同職孔述睿等爭忿細故數侵述睿述睿長者讓而不爭無何泌卒竇叅秉政惡其為人貶吉州別駕久之授吉州刺史齊映廉察江西行部過吉州故事刺史始見觀察使皆戎服趨庭致禮映雖嘗為宰相然驟達後進峘自恃前輩有以過映不欲以戎服謁入告其妻韋氏恥抹首趨庭謂峘曰卿自視何如人白頭走小生前卿如不以此禮見映雖黜死我亦無恨峘曰諾即以客禮謁之映雖不言深以為憾映至州奏峘亂

前政過失鞫之無狀不宜按部臨人貶衢州別駕衢州
刺史田敦岍知舉時進士門生也初岍當貢部放榜日
貶逐與敦不相面敦聞岍來喜曰始見座主迎謁之禮
甚厚敦月分俸之半以奉岍岍在衢州殆十年順宗即
位以秘書少監徵既至而卒元和三年岍子太僕寺丞
丕始獻岍所撰代宗實錄四十卷初岍坐李泌貶監修
國史奏岍所撰實錄一分請於貶所畢功至是方奏以
功贈工部尚書

歸崇敬字正禮蘇州吳郡人也曾祖奧以崇敬故追贈
秘書監祖樂贈房州刺史父待聘亦贈秘書監崇敬少
勤學以經業擢第遭喪哀毀以孝聞調授四門助教天
寶末對策高第授左拾遺改秘書郎遷起居郎贊善大
夫兼史館修撰又加集賢殿校理以家貧求為外職歷
同州潤州長史會玄宗肅宗二帝山陵叅掌禮儀遷主
客員外郎又兼史館修撰改膳部郎中崇敬以百官朔
望朝服袴褶非古上疏云按三代典禮兩漢史籍並無

袴褶之制亦未詳所起之由隋代已來始有服者事不
師古伏請停罷從之又諫東都太廟不合置木主謹按
典禮虞主用桑練主用栗作桑主則埋栗主作栗主則
埋桑主所以神無二主天無二日土無二王也東都太
廟是則天皇后所建以置武氏木主中宗去其主而存
其廟蓋將以備行幸遷都之置也且殷人屢遷前八後
五則前後遷都一十三度不可每都而別立神主也議
者或云東都神主已曾虔奉而禮之豈可一朝廢之乎

且虞祭則立桑主而虔祀練祭則立粟主而埋桑主豈
桑主不曾虔祀而乃埋之又所闕之主何須更作作之
不時恐非禮也又議云每年春秋二時釋奠文宣王祝
板御署訖北面揖臣以為禮太重謹按大戴禮師尚父
授周武王丹書武王東面而立今署祝板伏請準武王
東面之禮輕重庶得其中時有術士巨彭祖上疏云大
唐土德千年合符請每四季郊祀天地詔禮官儒者議
之崇敬議曰按舊禮立春之日迎春於東郊祭青帝立

夏之日迎夏於南郊祭赤帝先立秋十八日迎黃靈於
中地祀黃帝秋冬各於其方黃帝於五行為土王在四
季生於火故火用事之末而祭之三季則否漢魏周隋
共行此禮國家土德乘時亦以每歲六月土王之日祀
黃帝於南郊以后土配所謂合禮今彭祖請用四季祠
祀多憑緯候之說且據陰陽之說事涉不經恐難行用
又議祭五人帝不稱臣云太昊五帝人帝也於國家即
為前後之禮無君臣之義若於人帝而稱臣則於天帝

復何稱也議者或云五人帝列於月令分配五時則五神五音五祀五蟲五臭五穀皆備以備其時之色數非謂別有尊崇也又請太祖景皇帝配天事已具禮儀志自是國典大禮崇敬常叅議焉大歷初以新羅王卒授崇敬倉部郎中兼御史中丞賜紫金魚袋充弔祭冊立新羅使至海中流波濤迅急舟船壞漏衆咸驚駭舟人請以小艇載崇敬避禍崇敬曰舟中凡數十百人我何獨濟逡巡波濤稍息竟免為害故事使新羅者至海東

多有所求或攜資帛而往貿易貨物規以為利崇敬一
皆絕之東夷稱重其德使還授國子司業兼集賢學士
與諸儒官同修通志崇敬知禮儀志衆稱允當時皇太
子欲以仲秋之月於國學行齒胄之禮崇敬以國學及
官名不稱請改國學之制兼更其名曰禮記王制曰天
子學曰辟雍又五經通義云辟雍養老教學之所也以
形制言之雍壅也辟壁也壅水環之圓如壁形以義理
言之辟明也雍和也言以禮樂明和天下禮記亦謂之

澤宮射義云天子將祭必先習射於澤宮故前代文士亦呼云璧池亦曰璧沼亦謂之學省後漢光武立明堂辟雍靈臺謂之三雍宮至明帝躬行養老於其中晉武帝亦作明堂辟雍靈臺親臨辟雍行鄉飲酒之禮又別立國子學以殊士庶永嘉南遷惟有國子學不立辟雍北齊立國子寺隋初亦然至煬帝大業十三年改為國子監今國家富有四海聲明文物之盛惟辟雍獨闕伏請改國子監為辟雍省又以祭酒之名非學官所宜按

周禮師氏掌以媼詔王教國子請改祭酒為太師氏位
正三品又司業者義在禮記云樂正司業正長也言樂
官之長司主此業爾雅云大板謂之業按詩周頌設業
設簾崇牙樹羽則業是懸鐘磬之拘簾也今太學既不
教樂於義則無所取請改司業一為左師一為右師位
正四品又以五經六籍古先哲王致理之式也國家創
業制取賢之法立明經發微言於衆學釋回增美選賢
與能自艱難已來取人頗易考試不求其文義及第先

取於帖經遂使專門業廢請益無從師資禮虧傳受義絕今請以禮記左傳為大經周禮毛詩為中經尚書周易為小經各置博士一員其公羊穀梁文疏少請共準一中經道置博士一員所擇博士兼通孝經論語依憑章疏講解分明注引旁通問十得九兼德行純潔文詞雅正儀形規範可為師表者令四品以上各舉所知在外者給驛年七十已上者蒲輪其國子太學四門三館各立五經博士品秩上下生徒之數各有差其舊博士

助教直講經直及律館算館助教請皆罷省其教授之法學生至監謁同業師其所執贄脯脩一束清酒一壺衫布一段其色隨師所服師出中門延入與坐割脩斟酒三爵而止乃發篋出經摳衣前請師為依經辨理略舉一隅然後就室每朝晡二時請益師亦二時居講堂說釋道義發明大體兼教以文行忠信之道示以孝悌睦友之義旬省月試時考歲貢以生徒及第多少為博士考課上下其有不率教者則櫟楚朴之國子不率教

者則申禮部移為太學太學之不變者移之四門四門之不變者歸本州之學州學之不變者復本役終身不齒雖率教九年而學不成者亦歸之州學其禮部考試之法請無帖經但於所習經中問太義二十得十八為通無論語孝經各問十得八兼讀所問文注義疏必令通熟者為一通又於本經問時務策三道通二為及第其中有孝行聞於鄉閭者舉解具言於習業之下省試之日觀其所試義少兩道亦請兼取其天下鄉貢亦如

之習業考試並以明經為名得第者授官之資與進士同若此則教義日深而禮讓興禮讓興則強不犯弱眾不暴寡此由太學而來者也詔下尚書集百寮定議以聞議者以為省者禁也非外司所宜名周禮代掌其職者曰氏國學非代官不宜曰太師氏其餘大抵以習俗既久重難改作其事不行會國學胥吏以餐錢差舛御史臺按問坐貶饒州司馬建中初又拜國子司業尋選為翰林學士遷左散騎常侍加銀青光祿大夫尋兼普

王元帥叅謀累加光祿大夫以兩河叛渙之徒初稟朝
命令崇敬以本官兼御史大夫持節宣慰奉使稱旨及
還上表請歸拜墓許之賜以繒帛儒者榮之尋加特進
檢校戶部尚書遷工部尚書並依前翰林學士充皇太
子侍讀累表辭以年老乞骸骨改兵部尚書致仕貞元
十五年卒時年八十廢朝一日贈左僕射子登嗣登字
冲之雅實弘厚事繼母以孝稱大歷七年舉孝廉高第
補四門助教貞元初復登賢良科自美原尉拜右拾遺

時裴延齡以姦佞有恩欲為相諫議大夫陽城上疏切直德宗赫怒右補闕熊執易等亦以危言忤旨初執易草疏成示登登愕然曰願寄一名雷電之下安忍令足下獨當自是同列切諫登每聯署具奏無所迴避時人稱重轉右補闕起居舍人三任十五年同列嘗出其下者多以馳驚至顯官而登與右拾遺蔣武退然自守不以淹速介意後遷兵部員外郎充皇子侍讀尋加史館修撰順宗初以東朝舊恩超拜給事中旋賜金紫仍錫

衫笏馬遷工部侍郎與孟簡劉伯芻蕭俛受詔同翻譯
大乘本生心地觀經又為東宮及諸王侍讀獻龍樓箴
以諷久之改左散騎常侍因中謝憲宗問時所切登以
納諫為對時論美之轉兵部侍郎兼判國子祭酒事遷
工部尚書元和十五年卒年六十七贈太子少保登有
文學工草隸寬博容物嘗使僮飼馬馬蹄蹠僮怒擊折
馬足登知而不責晚年頗好服食有饋金石之藥者且
云先嘗之矣登服之不疑藥發毒幾死方訊云未之嘗

他人為之怒登視之無愠色常慕陸象先之為人議者亦以為近之子融嗣融進士擢第自監察拾遺入省拜工部員外郎遷考功員外六年轉工部郎中充翰林學士八年正拜舍人九年轉戶部侍郎開成元年兼御史中丞湖南觀察使盧周仁違勅進羨餘錢十萬貫融奏曰天下一家何非君土中外財賦皆陛下府庫也周仁輒陳小利妄設異端言南方火災恐成灰燼進於京國姑徇私誠入財貨以希恩待朝廷而何淺臣恐天下放

效以羨餘為名因緣剝剝生人受弊周仁請行重責以例列藩其所進錢請還湖南代貧下租稅詔周仁所進於河陰院收貯以備水旱金部員外郎韓益判度支案子弟受人賂三千餘貫半是擬贓上問融曰韓益所犯與盧元中姚康孰甚對曰元中與康枉破官錢三萬餘貫益所取受人事比之殊輕乃貶梧州司戶尋遷京兆尹時府司物力不充特勅賜錢五萬貫府司以所賜之半還司農寺菜錢融因對言之上以融學家因問蔬糲

字有賴音何也糲是飯之極麤者耶融以義類對之時
兩公主出降府司供帳事殷又俯近上已曲江賜宴奏
請改日上曰去年重陽取九月十九日未失重陽之意
今改取十三日可也既而李固言作相素不悅融罷尹
月餘授秘書監俄而固言罷楊嗣復輔政以融權知兵
部侍郎一年內拜吏部三年檢校禮部尚書興元尹兼
御史大夫充山南西道節度使融子仁晦仁翰仁憲仁
召仁澤皆登進士第咸通中並至達官

奚陟字殷卿亳州人也祖乾繹天寶中弋陽郡太守陟少好讀書登進士第又登制舉文詞清麗科授弘文館校書尋拜大理評事佐入吐蕃使不行授左拾遺丁父母憂哀毀過禮親朋愍之車駕幸興元召拜起居郎翰林學士辭以疾病久不赴職改太子司議郎歷金部吏部員外郎左司郎中彌綸省闕又累奉使皆稱旨貞元八年擢拜中書舍人是歲江南淮西大雨為災令陟勞問巡慰所在人安悅之中書省故事姑息胥徒以常在

宰相左右也陟皆以公道處之先是右省雜給率分等第皆據職田頃畝即主書所受與右史等陟乃約以料錢為率自是主書所得減拾遺時中書令李晟所請紙筆雜給皆不受但告雜事舍人令且貯之他日便悉以遺舍人前例雜事舍人自攜私入陟以所得均分省內官又躬親庶務下至園蔬皆悉自點閱人以為難陟處之無倦遷刑部侍郎裴延齡惡京兆尹李充有能政專意陷害之誣奏充結陸贄數厚賂遺金帛充既貶官又

奏充比者妄破用京兆府錢穀至多請令比部勾覆以
比部郎中崔元翰陷充怨惡贄也詔許之元翰曲附延
齡劾治府史府史到者雖無過犯皆笞決以立威時論
喧然陟廼躬自閱視府案具得其實奏言據度支奏京
兆府貞元九年兩稅及已前諸色羨餘錢共六十八萬
餘貫李充並妄破用今所勾勘一千二百貫已來是諸
縣供館驛加破及在諸色人戶腹內合收其斛斛共三
十二萬石惟三百餘石諸色輸納所由欠折其餘並是

準勅及度支符牒給用已盡陟之寬平守法多如此類
元翰既不遂其志因此憤恚而卒陟尋以本官知吏部
選事銓綜平允有能名遷吏部侍郎所莅之官時以為
稱職貞元十五年卒年五十五贈禮部尚書

張薦字孝舉深州陸澤人祖薦字文成聰警絕倫書無
不覽為兒童時夢紫色大鳥五彩成文降于家庭其祖
謂之曰五色赤文鳳也紫文鸞鷟也為鳳之佐吾兒當
以文章瑞於明廷因以為名字初登進士第對策尤工

考工員外郎審味道賞之曰如此生天下無雙矣調授
岐王府叅軍又應下筆成章及才高位下詞標文苑等
科薦凡應八舉皆登甲科再授長安尉遷鴻臚丞凡四
叅選判策為銓府之最員外郎員半千謂人曰張子之
文如青錢萬簡萬中未聞退時時流重之目為青錢學
士然性褊躁不持士行尤為端士所惡姚崇甚薄之開
元初澄正風俗薦為御史李全交所紿言薦語多譏刺
時坐貶嶺南刑部尚書李日知奏論乃追勅移於近處

開元中入為司門員外郎卒驚下筆敏速著述尤多言頗詼諧是時天下知名無賢不肖皆記誦其文天后朝中使馬仙童陷默啜默啜謂仙童曰張文成在否曰近自御史貶官默啜曰國有此人而不用漢無能為也新羅日本東夷諸蕃尤重其文每遣使入朝必重出金貝以購其文其才名遠播如此薦少精史傳顏真卿一見歎賞之天寶中浙西觀察使李涵表薦其才可當史任乃詔授左司禦率府兵曹叅軍既至闕下以母老疾竟

不拜命母喪闋禮部侍郎于邵舉前事以聞召充史館
修撰兼陽翟尉朱泚之亂變姓名伏匿城中因著史遁
先生傳德宗還宮擢拜左拾遺貞元元年冬上親郊時
初克復簿籍多失禮文錯亂乃以薦為太常博士叅典
禮儀四年迴紇和親以檢校右僕射刑部尚書關播充
使送咸安公主入蕃以薦為判官轉殿中侍御史使還
轉工部員外郎改戶部本司郎中十一年拜諫議大夫
仍充史館修撰時裴延齡恃寵譖毀士大夫薦欲上書

論之屢揚言未果延齡聞之怒奏曰諫官論朝政得失
史官書人君善惡則領史職者不宜兼諫議德宗以為
然薦為諫議月餘改秘書少監延齡排擯不已會差使
冊迴紇毘伽懷信可汗及弔祭乃命薦兼御史中丞入
迴紇二十年吐蕃贊普死以薦為工部侍郎兼御史大
夫充入吐蕃弔祭使涉蕃界二千餘里至赤嶺東被病
歿於紇壁驛吐蕃傳其柩以歸順宗即位凶問至詔贈
禮部尚書薦自拾遺至侍郎僅二十年皆兼史館修撰

三使絕域皆兼憲職以博洽多能敏於占對被選有文集三十卷及所撰五服圖宰輔畧靈怪集江左寓居錄等並傳于時子又新希復皆登進士第又新幼工文善於傳會長慶中宰相李逢吉用事翰林學士李紳深為穆宗所寵逢吉惡之求朝臣中允險敢言者倚撫紳陰事俾暴揚於播紳間又新與拾遺李續之劉棲楚尤蒙逢吉睞待指為鷹犬穆宗崩昭愍初即位又新等構紳貶端州司馬朝臣表賀又至中書賀宰相及門門者止

之曰請少留緣張補闕在齋內與相公談俄而又新揮汗而出旅揖群官曰端溪之事又新不敢多讓人皆辟易憚之與續之等七人時號八關十六子寶歷三年逢吉出為山南東道節度使請又新為副使李續之為行軍司馬逢吉為宰相時用門下省主事田任任犯賊亡命逢吉保之于外及罷相裴度發其事逢吉坐罰俸又詔曰朕在億兆人之上不令而人化不言而人信者法也法行則君主重法廢則朝廷輕田任常挂亡命之章

偷請養賢之祿迹在搜捕公行人間而更冒選吏曹顯
擬郡佐及黃樞覆驗烏府追擒證逮皆明姦狀盡得三
移憲牒一無申陳衆狀滿前羣議溢耳終則步健不至
琅璫空來蔑視紀綱頗同侮詭顧茲叅畫負我上台閱
視連名伊爾二子又新可汀州刺史李續之可涪州刺
史及逢吉致仕李訓用事復召二子為尚書郎訓敗復
貶而卒希復子讀登進士第有俊才累官至中書舍人
禮部侍郎典貢舉時稱得士位終尚書左丞

蔣又字德源常州義興人也祖瓌太子洗馬開元中弘
文館學士父將明累遷至左司郎中國子司業集賢殿
學士副知院事代為名儒而又史官吳兢之外孫以外
舍富墳史幼便記覽不倦七歲時誦庾信哀江南賦數
徧而成誦在口以聰悟強力聞於親黨間弱冠博通羣
籍而史才尤長其父在集賢時以兵亂之後圖籍溷雜
乃白執政請攜又入院令整比之宰相張鎰見而奇之
乃署為集賢小職又編次踰年於亂中勒成部帙得二

萬餘卷再遷王屋尉充太常禮院修撰貞元九年轉右拾遺充史館修撰十三年以故河中節度使張茂昭弟光祿少卿同正茂宗尚義章公主茂宗方居母喪有詔起復雲麾將軍成禮詔下又上疏諫曰墨纁之禮奉緣金革從古已來未有駙馬起復上主者既乖典禮且違人情切恐不可上令中使宣諭云茂宗母臨亡有請重違其心又又拜疏辭逾激切德宗於延英特召入對上曰卿所言古禮也朕聞如今人家往往有借吉為婚嫁

者卿何苦固執對曰臣聞里俗有不甚知禮法者或女居父母服內家既貧匱旁無至親即有偕吉以就禮者男子偕吉而娶臣未嘗聞之況陛下臨御已來每事憲章典禮建中年郡縣主出降皆詔有司依禮不用俗儀天下慶戴忽今駙馬起復成禮實恐驚駭物聽臣或聞公主年甚幼小即更俟一年出降時既未失且合禮經實天下幸甚上曰卿言甚善更俟商量俄而韋彤裴堪諫疏繼入上不悅促令奉行前詔然上心頗重又上嘗

登凌煙閣見左壁顏剡文字殘缺每行僅有三五字命錄之以問宰臣宰臣遽受宣無以對即令召人至對曰此聖歷中侍臣圖贊臣皆記憶即於御前口誦以補其缺不失一字上歎曰虞世南暗寫列女傳無以加也十八年遷起居舍人轉司勳員外郎皆兼史職時集賢學士甚衆會詔問神策軍建置之由相府討求不知所出諸學士悉不能對乃訪於人又徵引根源事甚詳悉宰臣高郢鄭珣瑜相對曰集賢有人矣翌日詔兼判集賢

院事父子代為學士儒者榮之時順宗祔廟將行祧遷之禮詔公卿議咸云中宗中興之主不當遷又建議云中宗既正位柩前乃受母后篡奪五王翼戴方復大業此乃由我失之因人得之止可同於返正不得號為中興羣議紛然竟依人所執元和二年遷兵部郎中與許孟容韋貫之等受詔刪定制勅成三十卷奏行用改秘書少監復兼史館修撰尋奉詔與獨孤郁韋處厚同修德宗實錄五年書成奏御以功拜右諫議大夫明年監

修國史裴垪罷相李吉甫再入以垪之修撰改授太常少卿久之遷秘書監又性朴直不能事人或遇權臣專政輒數歲不遷官在朝垂三十年前後每有大政事大議論宰執不能裁決者必召以咨訪又徵引典故以叅時事多合其宜然亦以此自滯而好學不倦老而彌篤雖甚寒暑手不釋卷旁通百家尤精歷代沿革家藏書一萬五千卷本名武因憲宗召對奏曰陛下已誅羣寇偃武修文臣名於義未允請改名又上忻然從之時

帝方用兵兩河又亦因此諷諭耳又居史任二十年所著大唐宰相錄七十卷凌煙閣功臣秦府十八學士史臣等傳四十卷長慶元年卒年七十五贈禮部尚書諡曰懿子係仲偕仙佶係太和初授昭應尉直史館二年拜右拾遺史館修撰典實有父風與同職沈傳師鄭澣陳夷行李漢等受詔撰憲宗實錄四年書成奏御轉尚書工部員外遷奉司郎中仍兼史職宰相宋申錫為北軍羅織罪在不測係與諫官崔玄亮泣諫於玉階之下

中錫亦減死時論稱之開成中轉諫議大夫武宗朝李德裕用事惡李漢以係與漢僚壻出為桂管都防禦觀察使宣宗即位徵拜給事中集賢殿學士判院事轉吏部侍郎改左丞出為興元節度使入為刑部尚書俄檢校戶部尚書鳳翔尹充鳳翔隴右節度使入為兵部尚書以弟仲為丞相懇辭朝秩檢校尚書左僕射襄州刺史山南東道節度使封淮陽縣開國公食邑五百戶仲登進士第歷佐使府大中初入朝右補闕史館修撰轉中

書舍人召入翰林為學士自員外郎中至戶部侍郎學士承旨轉兵部侍郎大中末中書侍郎平章事仙佶皆至刺史偕有史才以父任歷官左拾遺史館修撰轉補闕咸通中與同職盧耽牛叢等受詔修文宗實錄蔣氏世以儒史稱不以文藻為事惟伸及係子兆有文才登進士第然不為文士所譽與柳氏沈氏父子相繼修國史實錄時推良史京師云蔣氏日歷士族靡不家藏焉柳登字成伯河東人父芳肅宗朝史官與同職韋述受

詔添修吳兢所撰國史殺青未竟而述亡芳緒述凡例
勒成國史一百三十卷上自高祖下止乾元而叙天寶
後事絕無倫類取捨非工不為史氏所稱然芳勤於記
註含毫罔倦屬安史亂離國史散落編綴所聞率多闕
漏上元中坐事徙黔中遇內官高力士亦貶巫州遇諸
逢芳以所疑禁中事咨於力士力士說開元天寶中時
政事芳隨口志之又以國史已成經於奏御不可復改
乃別撰唐歷四十卷以力士所傳載於年歷之下芳自

永寧尉直史館轉拾遺補闕員外郎皆居史任位終右
司郎中集賢學士登少嗜學與弟冕咸以該博著稱登
年六十餘方從宦遊累遷至膳部郎中元和初為大理
少卿與刑部侍郎許孟容等七人奉詔刪定開元已後
勅格再遷右庶子以衰病改秘書監不拜授右散騎常
侍致仕長慶二年卒時九十餘輟朝一日贈工部尚書
弟冕冕文史兼該長於吏職貞元初為太常博士二年
昭德王皇后之喪論皇太子服紀左補闕穆質請依禮

周朞而除冕與同職張薦等奏議曰準開元禮子為母
齊縗三年此王公已下服紀皇太子為皇后喪服國禮
無聞昔晉武帝元皇后崩其時亦疑太子所服杜元凱
奏議曰古者天子三年之喪既葬除服魏氏革命亦以
既葬為節故天子諸侯之禮嘗已具矣惡其害已而削
去其節今其存者惟士喪禮一篇戴聖之記錯雜其內
亦難以取正皇太子配二尊與國為體固宜卒哭而除
服於是山濤魏舒並同其議晉朝從之歷代遵行垂之

不朽臣謹按實錄文德皇后以貞觀十年九月崩十一月葬至十一年正月除晉王治為并州都督晉王即高宗在藩所封文德皇后幼子據其命官當已除之義也今請皇太子依魏晉故事為大行皇后喪服葬而虞虞而卒哭卒哭而除心喪終制庶存厭降之禮事下中書宰臣召問禮官曰語云子食於有喪者之側未嘗飽也今豈可令皇太子緣服侍膳至於既葬乎準令羣臣齊緣給假三十日即公除約於此制更審議之張薦曰請

依宋齊間皇后為父母服三十日公除例為皇太子喪服之節三十日公除詔於正內則服墨慘歸至奉院纓麻如故穆質曰杜元凱既葬除服之論不足為法臣愚以為遵三年之制則太重從三十日之變太輕惟行古之道以周年為定詔宰臣與禮官定可否宰臣以穆質所奏問博士冕對曰準禮三年喪無貴賤一也豈有以父母貴賤而差降喪服之節乎且禮有公門脫齊纓開元禮皇后為父母服十三月其稟朝旨十三日而除皇

太子為外祖父母服五月其從朝旨則五日而除所以然者恐喪服侍奉有傷至尊之意也故從權制昭著國章公門脫縗義亦在此豈皆為金革乎皇太子今若抑哀公除墨縗朝覲歸至本院依舊縗麻酌於變通庶可傳繼宰臣然其議遂命太常卿鄭叔則草奏以覓議為是而穆質堅執前義請依古禮不妨太子墨縗於內也宰臣齊映劉滋叅酌羣議請依叔則之議制從之及董晉為太常卿德宗謂之曰皇太子所行周服非朕本意

有諫官橫論之今熟計之即禮官請依魏晉故事斯甚折衷明年冬上以太子久在喪合至正月晦受吉服欲以其年十一月釋衰麻以及新正稱慶有司皆論不可乃止六年十一月上親行郊享上重慎祀典每事依禮時冕為吏部郎中攝太常博士與司封郎中徐岱倉部郎中陸質工部郎中張薦皆攝禮官同修郊祀儀注以備顧問初詔以皇太子亞獻終獻當受誓戒否冕對曰準開元禮有之然誓詞云不供其職國有常刑今太子

受誓請改云各揚其職肅奉常儀上又問升郊廟去劔履及象劔尺寸之度祀文輕重之宜冕據禮經沿革聞奏上甚嘉之冕言事頗切執政不便之出為婺州刺史十三年兼御史中丞福州刺史充福建都團練觀察使冕在福州奏置萬安監牧於泉州界置羣牧五悉索部內馬五千七百匹驢騾牛八百頭羊三千口以為監牧之資人情大擾暮年無所滋息詔罷之以政無狀詔以閩濟美代歸而卒子璟登進士第亦以著述知名璟實

歷初登進士第三遷監察御史時郊廟告祭差攝三公
行事多以雜品璟時監察奏曰準開元二十三年勅宗
廟大祠宜差左右丞相嗣王特進少保少傅尚書賓客
御史大夫又二十五年勅太廟五享差丞相師傅尚書
嗣郡王道攝餘司不在差限又元和四年勅太廟告祭
攝官太尉以宰相充其攝司空司徒以僕射尚書師傅
充餘司不在差限比來吏部因循不守前後勅文用人
稍輕請自今年冬季勅吏部準開元元和勅例差官從

之再遷度支員外郎轉吏部開成初換庫部員外郎知制誥尋以本官充翰林學士初璟祖芳精於譜學永泰中按宗正譜課自武德已來宗枝昭穆相承撰皇室譜二十卷號曰永泰新譜自後無人修續璟因召對言及圖譜事文宗曰卿祖嘗為皇家圖譜朕昨觀之甚為詳悉卿檢永泰後試修續之璟依芳舊式續德宗後事成十卷以附前譜仍詔戶部供紙筆厨料五年拜中書舍人充職武宗朝轉禮部侍郎再司貢籍時號得人子韜

亦以進士擢第

沈傳師字子言吳人父既濟博通群籍史筆尤工吏部侍郎楊炎見而稱之建中初炎為宰相薦既濟才堪史任召拜左拾遺史館修撰既濟以吳兢撰國史以則天事立本紀奏議非之曰史氏之作本乎懲勸以正君臣以維家邦前端千古後法萬代使其生不敢差死不妄懼緯人倫而經世道為百王準的不止屬辭比事以日繫月而已故善惡之道在乎勸誠勸誠之柄存乎褒貶

是以春秋之義尊卑輕重升降幾微髣髴雖一字二字
必有微旨存焉況鴻名大統其可以貸乎伏以則天皇
后初以聰明睿哲內輔時政厥功茂矣及弘道之際孝
和以長君嗣位而太后以專制臨朝俄又廢帝或幽或
徙既而握圖稱籙移運革名牝司驚喙之蹤難乎備述
其後五王建策皇運復興議名之際得無降損必將義
以親隱禮從國諱苟不及損當如其常安可橫絕彝典
超居帝籍昔仲尼有言必也正名故夏殷二代為帝者

三十世矣而周人通名之曰王吳楚越之君為王者百餘年而春秋書之為子蓋高下自乎彼而是非稽乎我過者抑之不及者援之不為弱減不為僭奪握中持平不振不傾使其求不可得而蓋不可掩斯古君子所以慎其名也夫則天體自坤順位居乾極以柔乘剛天紀倒張進以強有退非德讓今史臣追書當稱之太后不宜曰上孝和雖迫母后之命降居藩邸而體元繼代本吾君也史臣追書宜稱曰皇帝不宜曰廬陵王睿宗在

景龍已前天命未集徒稟后制假臨大寶於倫非次於義無名史臣書之宜曰相王未宜曰帝若以得失既往遂而不舉則是非褒貶安所辨正載筆執簡謂之何哉則天廢國家歷數用周正朔廢國家太廟立周七廟鼎命革矣徽號易矣旂裳服色既已殊矣今安得以周氏年歷而列為唐書帝紀徵諸禮經是謂亂名且孝和繼天踐祚在太后之前而叙年製紀居太后之下方之躋僖是謂不智詳今考古並未為可或曰班馬良史也編

述漢事立高后以續帝載豈有非之者乎答曰昔高后稱制因其曠嗣獨有分王諸呂負於漢約無遷鼎革命之甚況其時孝惠已歿孝文在下宮中二子非劉氏種不紀呂后將紀誰焉雖云其然議者猶為不可况遷鼎革命者乎或曰若天后不紀帝緒缺也則二十二年行事何所繫乎曰孝和以始年登大位以季年復舊業雖尊名中奪而天命未改足以首事足以表年何所拘闕裂為二紀昔魯昭之出也春秋歲書其居曰公在乾侯

且君在雖失位不敢廢也今請併天后紀合孝和紀每
於歲首必書孝和所在以統之書曰其年春正月皇帝
在房陵太后行某事改某制云云則紀稱孝和而事述
太后俾名不失正而禮不違常名禮兩得人無間矣其
姓氏名諱入宮之由歷位之資才藝智略年辰崩葬別
纂錄入皇后傳列於廢后王庶人之下題其篇曰則天
順聖武后云事雖不行而史氏稱之德宗初即位銳於
求理建中二年夏勅中書門下兩省分置待詔官三十

員以見官前任及同正試攝九品已上擇文學理道韜
鈴法度之深者為之各準品秩給俸錢廩餼幹力什器
館宇之設以公錢為之本收息以贍用物論以為兩省
皆名侍臣足備顧問無勞別置冗員既濟上疏論之曰
臣伏以陛下今日之理患在官煩不患員少患在不問
不患無人且中書門下兩省常侍諫議補闕拾遺總四
十員及常參待制之官日有兩人皆備顧問亦不少矣
中有二十一員尚闕人未充他司缺職累倍其數陛下

若謂見官非才不足與議則當選求能者以代其人若欲務廣聰明畢收淹滯則當擇其可者先補缺員則朝無曠官俸不徒費且夫置錢息利是有司權宜非陛下經理之法今官三十員皆給俸錢幹力及厨廩什器建造廳宇約計一月不減百萬以他司息例準之當以錢二十萬為之本方獲百萬之利若均本配人當復除二百戶或許其入流反覆計之所損滋甚當今關輔大病皆為百司息錢傷人破產積於府縣實思改革以正本

源又臣嘗計天下財賦耗數之大者惟二事焉最多者
兵資次多者官俸其餘雜費十不當二事之一所以黎
人重困杼軸猶空方斯輯熙必藉裁減今四方形勢兵
罷未得資費之廣蓋非獲已陛下躬行儉約節用愛人
豈俾閑官復為冗食籍舊而置猶可省也若之何加焉
陛下必以制出不可改請重難慎擇遷延寢罷其事竟
不得行既而楊炎譴逐既濟坐貶處州司戶後復入朝
位終禮部員外郎傳師擢進士登制科乙第授太子校

書郎鄆縣尉直史館轉左拾遺左補闕並兼史職遷司
門員外郎知制誥召充翰林學士歷司勳兵部郎中遷
中書舍人性恬退無競時翰林未有承旨次當傳師為
之固稱疾宣召不起乞以本官兼史職俄兼御史中丞
出為潭州刺史湖南觀察使入為尚書右丞出為洪州
刺史江南西道觀察使轉宣州刺史宣歙池觀察使入
為吏部侍郎太和元年卒年五十九贈吏部尚書初傳
師父既濟撰建中實錄十卷為時所稱傳師在史館預

修憲宗實錄未成廉察湖南特詔齎一分史藁成於理
所有子樞詢皆登進士第詢歷清顯中書舍人翰林學
士禮部侍郎咸通中檢校戶部尚書潞州長史昭義節
度使為政簡易性本恬和奴歸秦者通詢侍者詢將戮
之未果奴結牙將為亂夜攻府第詢舉家遇害

史臣曰前代以史為學者率不偶於時多罹放逐其故
何哉誠以褒貶是非在於手賢愚輕重繫乎言君子道
微俗多忌諱一言切已嫉之如讎所以岷薦坎壈於仕

塗沈柳不登於顯貫後之載筆執簡者可以為之痛心
道在必伸物不終否子孫藉其餘祐多至公卿者盖有
天道存焉

贊曰褒貶以言孔道是模誅亂以筆亦有董狐邦家大
典班馬何辜懲惡勸善史不可無

舊唐書卷一百四十九

舊唐書卷一百四十九考證

歸崇敬傳作桑主則埋粟主作栗主則埋桑主○沈炳震曰按粟主禮無埋文作桑主以下七字疑衍

多憑緯候之說且據陰陽之說○臣酉按之說二字複見意亦雷同疑有衍文

舊唐書卷一百四十九考證

欽定四庫全書

舊唐書卷一百五十

後晉司空同中書門下平章事劉 昫撰

列傳第一百

德宗順宗諸子

舒王誼 通王湛 虔王諒 肅王詳

文敬太子諲 資王謙 代王誼

昭王誠 欽王諤 珍王誠 鄭王經

均王緯

淑王縱

莒王紆

密王綱

邠王綜

邵王約

宋王結

集王綰

冀王綽

和王綺

衡王絢

欽王績

會王纁

福王綰

珍王繕

撫王紘

岳王緄

袁王紳

桂王綸

翼王綽

蘄王緝

德宗皇帝一十子
昭德皇后王氏生順宗皇帝舒王誼
昭靖太子之子文敬太子順宗之子諸妃生通王已下

八王本錄不載母氏

舒王誼本名謨代宗第三子昭靖太子邈之子也以其
最幼德宗憐之命之為子大厯十四年六月封舒王拜
開府儀同三司與通王虔王同日封仍詔所司具開府
俸料逐月進內尋以軍興罷支建中元年領四鎮北庭
行軍涇原節度大使以涇州刺史孟皞為節度留後以
誼愛弟之子諸王之長軍國大事欲其更踐必委試之
明年尚父郭子儀病篤上御紫宸命誼持制書省之誼

冠遠遊冠絳紗袍乘象輅駕駟馬飛龍騎士三百人隨之國府之官皆袴褶騎而導前鹵簿脩引而不樂在道塞故也及門郭氏子弟迎拜於外王不荅拜子儀卧不能興以手叩頭謝恩而已王解冠珮以常服傳詔勞問之三年蔡帥李希烈叛詔哥舒曜討之八月希烈自帥衆三萬圍哥舒曜于襄城又詔河南都統李勉援之勉捨襄城令大將唐漢臣等選勁兵徑襲許州以解圍漢臣未至許上遣中使追之責以違詔亟旋師為賊所乘

漢臣之衆大敗勉恐東都危急乃分兵數千赴洛又為賊所隔賊衆急攻汴滑勉走宋州朝廷大聳乃詔誼為揚州大都督持節荆襄江西沔鄂等道節度兼諸軍行營兵馬元帥改名誼又以哥舒曜聲近士卒竊議改封普王令統攝諸軍進攻希烈仍以兵部侍郎蕭復為戶部尚書兼御史大夫元帥府統軍長史舊例有行軍長史以復父名衡特更之又以新除潭州觀察使孔巢父為右庶子兼御史大夫充行軍司馬以山南東道節度

行軍司馬檢校兵部郎中兼御史中丞樊澤為諫議大夫兼御史中丞行軍右司馬刑部員外郎劉從一為吏部郎中兼中丞侍御史章儼為工部郎中兼中丞並充元帥府判官兵部員外郎高叅為本司郎中充元帥府掌書記以右金吾大將軍渾瑊檢校工部尚書兼御史大夫為中軍虞候江西節度使嗣曹王臯為前軍兵馬使鄂岳團練使李兼為之副山南東道節度使賈耽為中軍兵馬使荆南節度使張伯儀充後軍兵馬使以左

神武軍使王价檢校太子賓客左衛將軍高承謙檢校太子詹事前司農少卿郭曙檢校左庶子前秘書省著作郎常愿為秘書少監並充元帥府押衙制下未行湮原兵亂而止德宗初聞兵士出怨言不得賞設乃令誼與翰林學士姜公輔傳詔安撫許以厚賞行及內門兵已陣於闕前誼狼狽而還遂奉德宗出幸奉天賊之攻城誼晝夜傳詔慰勞諸軍僅不解帶者月餘從車駕還宮復封舒王開府儀同三司揚州大都督如故永貞元

年十月薨廢朝三日

通王諶德宗第三子也大厯十四年封制授開府儀同三司貞元九年十月領宣武軍節度大使汴宋等州觀察支度營田等使以宣武都知兵馬使李萬榮為留後王不出閤十一年河東帥李自良卒以諶為河東節度大使以行軍司馬李說知府事充留後亦不出閤

虔王諒德宗第四子大厯十四年封授開府儀同三司貞元二年領蔡州節度大使申光蔡觀察等使以大將

吳少誠為留後十年領朔方靈鹽節度大使靈州大都督以朔方行軍司馬李樂為靈府左司馬知府事朔方留後十一年九月橫海大將程懷信逐其帥懷直十月以諒領橫海節度大使滄景觀察等使以都知兵馬使程懷信為留後王不出閤十六年徐帥張建封卒徐軍亂又以諒領徐州節度大使徐泗濠觀察處置等使以建封子愔為留後

肅王詳德宗第五子大歷十四年六月封建中三年十

月薨時年四歲廢朝三日贈揚州大都督性聰惠上尤憐之追念無已不令起墳墓詔如西域法議層甃造塔禮儀使判官司門郎中李岩上言曰墳墓之義經典有常自古至今無聞異制層甃起塔始於天竺名曰浮圖行之中華竊恐非禮況肅王天屬名位尊崇喪葬之儀存乎簡冊舉而不法垂訓非輕伏請準令造墳庶遵典禮詔從之

文敬太子諒順宗之子德宗愛之命為子貞元四年封

邕王授開府儀同三司七年定州張孝忠卒以諫領義武軍節度大使易定觀察等使以定州刺史張茂昭為留後十年六月潞帥李抱真卒又以諫領昭義節度大使澤潞邢洺磁觀察等使以潞將王虔休為潞府司馬知留後十五年十月薨時年十八廢朝三日贈文敬太子所司備禮冊命其年十二月葬於昭應有陵無號發引之日百官送於通化門外列位哭送是日風雪寒甚近歲未有詔置陵署令丞

資王謙德宗第七子大厯十四年封

代王諲德宗第八子本封縉雲郡王早薨建中二年追封代王

昭王誠德宗第九子貞元二十一年封

欽王諤德宗第十子順宗即位詔曰王者之制子弟畢封所以固藩輔而重社稷古今之通義也第十弟諤等寬簡忠厚生知孝敬行皆由禮志不違仁樂善本於性情好賢宗於師傅纘修六藝達人倫風化之源博習羣

言知惠和睦友之道溫恭朝夕允茂厥猷克有嘉聞宜封土字諤可封欽王第十一弟可封珍王

珍王誠德宗第十一子與欽王同制封德宗仁孝動循法度雖子弟姊妹之親無所假借建中初詔親王子弟帶開府朝秩者出就本班又以公主郡縣主出降與舅姑抗禮詔曰冠婚之義人倫大經昔唐堯降嬪帝乙歸妹迨於漢氏同姓主之爰自近古禮教陵夷公郡法度僭差殊制姻族闕齒序之義舅姑有拜下之禮自家刑

國多愧古人今縣主有行將俟嘉命俾親執棗栗以見舅姑敬遵宗婦之儀降就家人之禮事資變革以抑浮華其令禮儀使與禮官博士約古今舊儀及開元禮詳定公主郡縣主出降覲見之文儀以聞初開元中置禮會院于崇仁里自兵興已來廢而不修故公郡縣主不時降嫁殆三十年至有華髮而猶壯者雖居內館而不獲覲見十六年矣凡皇族子弟皆散棄無位或流落他縣湮沉不齒錄無異匹庶及德宗即位叙用枝屬以時

婚嫁公族老幼莫不悲感初即位將謁太廟始與公郡縣主相見於大次中尊者展其敬幼者申其愛歔歔哭泣之聲聞於朝公卿陪列者為之悽然每將有大禮必與諸父昆弟同其齋次及岳陽信寧宜芳永順朗陵陽安襄城德清南華元城新鄉等十一縣主同月出降勅所司大小之物必周其用至於櫛纚笄總皆經於心各給錢三百萬使中官主之以買田業不得侈用其衣服之飾使內司計造不在此數是時所司度人用一籠花

計錢七十萬帝曰籠花首飾婦禮不可闕然用費太廣
即無謂也宜損之又損之及三萬而止帝謂主等曰吾
非有所愛但不欲無益之費耳各以餘錢六十萬賜之
以備他用舊例皇姬下嫁舅姑返拜而婦不荅及是制
下禮官定制曰既成婚於禮會院明晨舅坐於堂東階
西向姑南向婦執笄盛以棗栗升自西階再拜跪奠於
舅席前退降受笄盛以暇修升北面再拜跪奠於姑席
前降東面拜婿之伯叔兄弟姊妹已而謝恩於光順門

壻之親族亦隨之然後會讌於十六宅是日縣主皆如其制初贈司徒沈易良之妻崔氏即太后之季父母也帝每見之方屣而鞞召王韋二美人出拜勅崔氏坐受勿荅故戚屬之閒罔不憚其敬不肅而遵禮法焉

順宗二十三子莊憲皇后王氏生憲宗皇帝王昭儀生鄭王經趙昭儀生宋王結王昭儀生郇王綜王昭訓生衡王絢餘十八王本錄不載母氏

鄭王經本名渙順宗次子始封建康郡王貞元二十一

年進封太和八年薨

均王緯本名沔順宗第三子始封洋川郡王貞元二十一年進封

淑王縱本名洵順宗第四子初授殿中監封臨淮郡王貞元二十一年進封

莒王紆本名浼順宗第五子初授秘書監封弘農郡王貞元二十一年進封太和八年薨

密王綢本名泳順宗第六子始封漢東郡王貞元二十

一年進封元和二年九月薨

郇王綜本名湜順宗第七子初授少府監封晉陵郡王
貞元二十一年進封元和三年四月薨

邵王約本名淑順宗第八子初授國子祭酒封高平郡
王貞元二十一年進封

宋王結本名滋順宗第九子始封雲安郡王貞元二十
一年進封長慶二年薨

集王綰貞元二十一年封長慶二年薨

冀王綽本名淮順宗第十子初授太常卿封宣城郡王
貞元二十一年進封太和九年薨

和王綺本名滑順宗第十一子始封德陽郡王貞元二
十一年進封太和七年薨

衡王絢順宗第十二子貞元二十一年封寶曆二年薨
欽王績順宗第十三子貞元二十一年封

會王纁順宗第十四子貞元二十一年封元和五年十
一月薨

福王綰本名浥順宗第十五子母莊憲王皇后憲宗同
出初授光祿卿封河東郡王貞元二十一年進封咸通
元年特冊拜司空明年薨

珍王繕本名況順宗第十六子初授衛尉卿封洛交郡
王貞元二十一年進封

撫王紘順宗第十七子貞元二十一年封咸通四年特
冊拜司空五年冊司徒乾符三年冊太尉其年薨

岳王縱順宗第十八子貞元二十一年封太和二年薨

袁王紳順宗第十九子貞元二十一年封太和十四年薨

桂王綸順宗第二十子貞元二十一年封太和九年薨
翼王綽順宗第二十一子貞元二十一年封咸通二年薨

蘄王緝順宗第二十二子咸通八年封

史臣曰夫聖人君臨寓縣肇啟邦基莫不受命上玄膺
名帝錄自太昊已降五運相推迄于殷湯歷數綿承但

設均平之化未聞封建之名洎乎周漢始以子弟建侯
樹屏以作維城及王室浸微遂有莽卓之亂唐室自艱
難已後兩河兵革屢興諸王雖封竟不出閭夫帝王居
寰宇之尊撫億兆之衆但能平一理道夙夜嚴恭任賢
使能設官分職自然四海樂推天命所佑縱無封建亦
鴻基永固安俟嬰孺鎮重哉

贊曰孝文秉禮道弘藩邸睦族展親儀刑戚里自閭臨
藩所謂周爰無如惡鳥終懷龍樊

舊唐書卷一百五十

舊唐書卷一百五十考證

新王緝傳順宗第二十二子咸通八年封○沈炳震曰
封字誤當是薨字新書傳云王六年咸通八年薨此
云是年封未知孰是

舊唐書卷一百五十考證

欽定四庫全書

舊唐書卷一百五十一

後晉司空同中書門下平章事劉 昫撰

列傳第一百一

高崇文

子承簡

伊慎 朱忠亮

劉昌裔

范希朝

王錡

子稷

閻巨源

孟元陽 趙昌

高崇文其先渤海人崇文生幽州朴厚寡言少從平盧

軍貞元中隨韓全義鎮長武城治軍有聲五年夏吐蕃
三萬寇寧州崇文率甲士三千救之戰於佛堂原大破
之死者過半韓全義入覲崇文掌行營節度留務遷兼
御史中丞十四年為長武城使積粟練兵軍聲大振永
貞元年冬劉闢阻兵朝議討伐宰臣杜黃裳以為獨任
崇文可以成功元和元年春拜檢校工部尚書兼御史
大夫統左神策行營節度使兼充左右神策奉天麟游
諸鎮兵以討闢時宿將專征者甚衆人人自謂當選及

詔出大驚崇文在長武城練卒五千常若寇至及是中使至長武邠時宣命而辰時出師五千器用無闕者軍至興元軍中有折逆旅之匕箸斬之以徇西從閬中入遂却劔門之師解梓潼之圍賊將邢泚遁歸屯軍梓州因拜崇文為東川節度使先是劉闢攻陷東川擒節度使李康及崇文克梓州乃歸康求雪已罪崇文以康敗軍失守遂斬之成都北一百五十里有鹿頭山扼兩川之要闢築城以守又連八柵張犄角之勢以拒王師是

日破賊二萬于鹿頭城下大雨如注不免登乃止明日又破于萬勝堆堆在鹿頭之東使驍將高霞寓親鼓士板緣而上矢石如雨又命敢死士連登奪其堆燒其柵柵中之賊殲焉遂據堆下瞰鹿頭城城中人物可數凡八大戰皆大捷賊搖心矣八月阿跌光顏與崇文約到行營愆一日懼誅乃深入以自贖故軍於鹿頭西大河之口以斷賊糧道賊大駭是日賊綿江柵將李文悅以三千人歸順尋而鹿頭將仇良輔舉城降者衆二萬闢

之男方叔子堦蘓強先監良輔軍是日械繫送京師降
卒投戈面縛者彌十數里遂長驅而直指成都德陽等
縣城皆鎮以重兵莫不望旗率服師無留行關大懼以
親兵及逆黨盧文若齎重寶西走吐蕃吐蕃素受其賂
且將啟之崇文遣高霞寓鄜定進倍道追之至羊灌田
及焉關自投岷江擒於湧湍之中西蜀平乃檻關送京
師伏法文若赴水死王師入成都介士屯于大達軍令
嚴肅珍寶山積市井不移無秋毫之犯先是賊將邢泚

以兵二萬為鹿頭之援既降又貳斬之以徇衣冠陷逆者皆匍匐衙門請命崇文條奏全活之制授崇文檢校司空兼成都尹充劔南西川節度管内支度營田觀察處置統押近界諸蠻西山八國雲南安撫等使改封南平郡王食實封三百戶詔刻石紀功于鹿頭山下崇文不通文字厭大府案牘諮稟之繁且以優富之地無所陳力乞居塞上以扞邊戍懇疏累上二年冬制加同中書門下平章事邠州刺史邠寧慶三州節度觀察等使

仍充京西都統恃其功而侈心大作帑藏之富百工之巧舉而自隨蜀都一罄以不習朝儀憚於入覲優詔令便道之鎮居三年大修戎備元和四年卒年六十四廢朝三日贈司徒謚曰威武配享憲宗廟庭子承簡少為忠武軍部將後入神策軍以父征劉闢拜嘉王傅裴度征淮蔡奏承簡以本官兼御史中丞為其軍都押衙淮西平詔以郾城上蔡遂平三縣為澉州治郾城用承簡為刺史尋轉邢州刺史值觀察使責時賦急承簡代數

百戶出其租遷宋州刺史屬汴州逐其帥以部將李芥行帥事芥遣其將責宋官私財物承簡執而囚之自是汴使來者輒繫之一日并出斬于軍門之外威震郡中及芥兵大至宋州凡三城已陷南一城承簡保北兩城以拒凡十餘戰會徐州救兵至芥為汴將李質執之傳送京師兵圍宋者即遁去授承簡檢校左散騎常侍充海沂密等州節度觀察處置等使俄遷檢校工部尚書義成軍節度鄭滑潁等州觀察處置等使就加檢校尚

書右僕射入拜右金吾衛大將軍充右街使復出為邠
寧慶等州節度觀察處置等使先是羗虜多以秋月犯
西邊承簡請軍寧州以備之因疾上言乞入覲即隨表
詣闕太和元年八月行至永壽縣傳舍卒贈司空崇文
孫駢歷位崇顯終淮南節度使自有傳

伊慎兗州人善騎射始為果毅喪母將營合祔不識其
父之墓晝夜號哭未決日夢寐有指導焉遂發壠果得
舊記驗大厯八年江西節度使路嗣恭討嶺南哥舒晃

之亂以慎為先鋒直逼賊壘疾戰破之斬首三千級由是復始興之地未幾與諸將追斬晃於泔溪函首獻于闕下嗣恭表慎功授連州長史知當州團練副使三遷江州別駕討梁崇義之歲慎以江西牙將統李希烈摧鋒陷敵功又居多江漢既平希烈愛慎之材數遺善馬意欲縻之慎以計遁歸命本道明年希烈果反嗣曹王臯始至鍾陵大集將吏得慎而壯之大集兵將繕理舟師希烈懼慎為曹王所任遺慎七屬之甲詐為慎書行

間馬上遣中使即軍以詰之曹王乃抗疏論雪上章未
報會賊兵泝江來寇曹王乃召慎勉之令戰大破三千
餘衆朝廷始信其不貳累破蔡山柵取蘄州降其將李
良又攻黃梅縣殺賊將韓霜露斬首千餘級優詔褒異
授試太子詹事封南充郡王又兼御史中丞蘄州刺史
充節度都知兵馬使建中末車駕在梁洋鹽鐵使包佶
以金幣泝江將進獻次于蘄口時賊已屠汴州遣驍將
杜少誠將步騎萬餘來寇黃梅以絕江道慎兵七千遇

於永安戍慎列樹三柵相去數里偃旗卧鼓於中柵聲鼓三柵悉兵以擊賊軍大亂少誠脫身以免斬級不可勝數江路遂通又破苟莽柵進兵圍安州賊阻湏水攻之不能下希烈遣其甥劉戒虛將騎八千來援慎分兵迎擊戰于應山擒戒虛縛示城下遂開門請罪以功拜安州刺史兼御史大夫仍賜實封一百戶希烈又遣將援隋州慎擊之於厲鄉走康叔夜斬首五千級希烈死李惠登為賊守隋州慎飛書招諭惠登遂以城降因密

奏惠登可用詔授隋州刺史貞元十五年以慎為安黃
等州節度管內支度營田觀察等使十六年吳少誠阻
命詔以本道步騎五千兼統荆南湖南江西三道兵當
其一面於申州城南前後破賊數千以例加檢校刑部
尚書二十一年於安黃置奉義軍額以為奉義軍節度
使檢校右僕射憲宗即位入朝拜右僕射元和二年轉
檢校左僕射兼右金吾衛大將軍以賂第五從直求鎮
河中為從直所奏貶右衛將軍數月復為檢校尚書右

僕射兼右衛上將軍元和六年卒年六十八贈太子太保

朱忠亮本名士明沛州浚儀人初事薛嵩為將大厯中詔鎮普潤縣掌屯田朱泚之亂以麾下四十騎奔奉天德宗嘉之封東陽郡王為奉天定難功臣及大駕南幸為虜騎所獲繫於長安賊平李晟釋之薦於渾瑊署定平鎮都虞候鎮使李朝寀卒遂代之憲宗即位加御史大夫築臨涇城有勞特加檢校工部尚書涇原四鎮節

度使仍賜名湮土舊俗多賣子忠亮以俸錢贖而還其親者約二百人元和八年卒贈右僕射

劉昌裔太原陽曲人少遊三蜀楊琳之亂昌裔說其歸順及琳授洺州刺史以昌裔為從事琳死乃去曲環將幽隴兵收濮州也辟為判官詔授監察御史累加至檢校兵部尚書賜紫兼中丞充營田副使貞元十五年環鎮許州卒詔上官浼知節度留後吳少誠攻許州浼領事欲棄城走昌裔追止之曰留後既受詔宜以死守城

況城中士馬足以破賊但堅壁不戰不過五七日賊勢必衰我以全制之可也況然之賊日夕攻急堞壞不得修昌裔令造戰棚木柵以待募壯士破營得突將千人鑿城分出大破之因立戰棚木柵於城上城以故不陷兵馬使安國寧與況不善謀反以城降賊事洩昌裔密計斬之即召其麾下千餘人食之賞縑二匹伏兵諸要巷令持縑者悉斬之無一人得脫十六年以全陳許功以況為節度使昌裔為陳州刺史韓全義之敗澠水也

與諸道兵皆走保陳州求舍昌裔登城謂曰天子命公討蔡州今來陳州義不敢納請舍城外而從千騎入全義營持牛酒勞軍全義不自意驚喜歎服十八年改充陳許行軍司馬明年浼卒詔昌裔為許州刺史充陳許節度使再加檢校右僕射元和八年五月許州大水壞廬舍漂溺居人六月徵昌裔加檢校左僕射兼左龍武統軍初昌裔以老疾而軍府無政因其水敗軍府上乃促令韓臯代之昌裔赴召至長樂驛聞有是命乃上言

風眩請歸私第許之其年卒贈潞州大都督

范希朝字致君河中虞鄉人建中年為邠寧虞候戎政修舉事節度使韓遊瓌及德宗幸奉天希朝戰守有功累加兼中丞為寧州刺史遊瓌入覲自奉天歸邠州以希朝素整肅有聲畏其逼已求其過將殺之希朝懼奔鳳翔德宗聞之趣召至京師置於左神策軍中遊瓌歿邠州諸將列名上請希朝為節度德宗許之希朝讓於張獻甫曰臣始偪而來終代其任非所以防覲覲安反

側也詔嘉之以獻甫統邠寧數日除希朝振武節度使
就加檢校禮部尚書振武有党項室韋交居川阜凌犯
為盜日入慝作謂之刮城門居人懼駭鮮有寧日希朝
周知要害置堡柵斥候嚴密人遂獲安異蕃雖鼠竊狗
盜必殺無赦戎虜甚憚之曰有張光晟苦我久矣今聞
是乃更姓名而來其見畏如此蕃落之俗有長帥至必
効奇駝名馬雖廉者猶曰當從俗以致其歡希朝一無
所受積十四年皆保塞而不為橫單于城中舊少樹希

朝於他處市柳子命軍人種之俄遂成林居人賴之貞
元末累表請修朝覲時節將不以他故自述職者惟希
朝一人德宗大悅既至拜檢校右僕射兼右金吾大將
軍順宗時王叔文黨用事將授韓泰以兵柄利希朝老
疾易制乃命為左神策京西諸城鎮行營節度使鎮奉
天而以泰為副欲因代之叔文敗而罷憲宗即位復以
檢校僕射為右金吾出拜檢校司空充朔方靈鹽節度
使突厥別部有沙陀者北方推其勇勁希朝誘致之自

甘州舉族來歸衆且萬人其後以之討賊所至有功遷
河東節度使率師討鎮州無功既耄且疾事不理除左
龍武統軍以太子太保致仕元和九年卒贈太子太師
希朝近代號為名將人多比之趙克國及張茂昭擊王
承宗幾覆希朝翫寇不前物議罪之

王鏐字昆吾自言太原人本湖南團練營將初楊炎貶
道州司馬鏐候炎於路炎與言異之後嗣曹王臯為團
練使擢任鏐頗便之使招邵州武岡叛將王國良有功

表為邵州刺史及臯改江西節度使李希烈南侵臯請
鏐以勁兵三千鎮尋陽後臯自以全軍臨九江既襲得
蘄州盡以衆渡乃表鏐為江州刺史兼中丞充都虞候
因以鏐從小習事善探得軍府情狀至於言語動靜
巨細畢以白臯臯亦推心委之雖家醮妻女之會鏐或
在焉鏐感臯之知事無所避後臯攻安州使伊慎盛兵
圍之賊懼臯使至城中以約降臯使鏐懸而入既成約
殺不從者以出明日城開臯以其衆入伊慎以賊恟懼

由其園也不下鍰鍰稱疾避之及臯為荆南節度使表
鍰為江陵少尹兼中丞欲列於賓倅馬異裴泰鄒鍰請
去乃復以為都虞候明年從臯至京師臯稱鍰於德宗
曰鍰雖文用小不足他皆可以試驗遂拜鴻臚少卿尋
除容管經畧使凡八年谿洞安之遷廣州刺史御史大
夫嶺南節度使廣人與夷人雜處地征薄而叢求於川
市鍰能計居人之業而權其利所得與兩稅相埒鍰以
兩稅錢上供時進及供奉外餘皆自入西南大海中諸

國舶至則盡沒其利由是錡家財富於公藏日發十餘
艇重以犀象珠貝稱商貨而出諸境周以歲時循環不
絕凡八年京師權門多富錡之財拜刑部尚書時淮南
節度使杜佑屢請代乃以錡檢校兵部尚書充淮南副
節度使錡始見佑以趨拜悅佑退坐司馬廳事數日詔
杜佑以錡代之錡明習簿領善小數以持下吏或有姦
錡畢究之嘗聽理有遺匿名書於前者左右取以授錡
錡內之鞞中鞞中先有他書以雜之及吏退錡採取他

書焚之人信其以所匿名者焚也既歸省所告者異日乃以他微事連其所告者固窮按驗之以譎衆下吏以爲神明鍰長於部領程作有法軍州所用竹木其餘碎屑無所棄皆復爲用掾曹簾壞吏以新簾易之鍰察知以故者付舡坊以替箸其他率如此每有饗宴輒錄其餘以備後用或云賣之收利皆自歸故鍰錢流行天下在鎮四年累至司空元和二年來朝真拜左僕射未幾除檢校司徒河中節度居三年兼太子太傅移鎮太原

時方討鎮州鏐輯綏訓練軍府稱理鏐受符節居方面
凡二十餘年九年加同平章事十年卒年七十六贈太
尉鏐將卒約束後事甚明如知其死日鏐附太原王昶
為從子以婚閥自炫昶子弟多附鏐以致名宦又嘗讀
春秋左氏傳自稱儒者人皆笑之子稷歷官鴻臚少卿
鏐在藩鎮稷嘗留京師以家財奉權要視官高下以進
賂不待白其父而行之廣治第宅嘗奏請藉坊以益之
作複垣洞穴實金錢於其中貴官清品溺其賞宴而遊

不憚清議及父卒為奴所告稷換鍰遺表隱沒所進錢物上令鞠其奴於內仗又發中使就東都驗責其家財宰臣裴度苦諫於是罷其使而殺奴稷長慶二年為德州刺史廣濟金寶僕妾以行節度使李全畧利其貨而圖之故致本州軍亂殺稷其室女為全畧所虜以妓媵虔之稷子叔泰開成四年滄州節度使劉約上言王稷為李全畧所殺家無遺類稷男叔泰時年五歲郡人宋忠獻匿之獲免乃收養之今已成長臣獎其義忠獻已

補職叔泰津送以聞文宗詔曰王鏐累朝宣力王稷一
旦捐軀須錄孤遺徵中憫念王叔泰委吏部與九品官
令奉祭

閻巨源貞元十九年以勝州刺史攝振武行軍司馬屬
希朝入覲遂代為節度以材力進無他智能初不知書
而好文其言輒乖誤時人多據其談說以為戲然以寬
厚為將卒所懷後為邠寧節度使檢校左僕射元和九
年卒

孟元陽起於陳許軍中理戎整肅勤事善部署曲環之
為節度元陽已為大將環使董作西華屯元陽盛夏甚
厲立稻田中須役者退而後就舍故其田歲無不稔軍
中足食環卒吳少誠寇許州元陽城守外無救兵攻圍
甚急而終不能傳其城賊乃罷兵韓全義五樓之敗諸
軍多私歸元陽及神策都將蘓元策宣州都將王幹各
率部留軍激水破賊二千餘人兵罷加御史大夫元和
初拜河陽節度檢校尚書五年拜右僕射昭義節度入

為右羽林統軍封趙國公俄拜左金吾大將軍復除統軍元和九年卒贈揚州大都督

趙昌字洪祚天水人祖不器父居貞皆有名於時李承昭為昭義節度辟昌在幕府貞元七年為虔州刺史屬安南都護為夷獠所逐拜安南都護夷人率化十年因屋壞傷脛懇疏乞還以檢校兵部郎中裴泰代之入拜國子祭酒及泰為首領所逐德宗詔昌問狀昌時年七十二而精健如少年者德宗奇之復命為都護南人相

賀憲宗即位加檢校工部尚書尋轉戶部尚書充嶺南
節度元和三年遷鎮荆南徵為太子賓客及得見拜工
部尚書兼大理卿歲餘讓卿守本官六年除華州刺史
辭於麟德殿時年八十餘趨拜輕捷召對詳明上退而
歎異宣宰臣密訪其頤養之道以奏焉在郡三年入為
太子少保九年卒年八十五贈揚州大都督諡曰成

史臣曰高崇文以律負師勤於軍政戎麾指蜀遽立奇
功可謂近朝之良將也伊慎朱忠亮劉昌裔范希朝闔

臣源孟元陽趙昌等各立功立事亦一時之名臣王鏐
明可照姦忠能奉王此乃垂名於後也至若竹頭木屑
曾無棄遺作事有程儉而足用則又士君子之為也如
賤收貴出務積珠金唯利是求多財為累則與夫清白
遺子孫者遠矣凡百在位得不鑑之

贊曰崇文之功顯於西蜀伊慎之忠見平南服朱劉范
閻各有其目元陽趙昌不無遺蹟惟彼太原戰勲可錄
累在多財子孫不祿

舊唐書卷一百五十一